



Pisortanit ikiorsiissutinut malittarisassanik qanoq ililluta sukaterisinnaavugut kiisalu qanoq pitsanngorsarsinnaanerigut apeqquteqaat aallaavigalugu oqallinnissamik siunnersuut, taamaalilluta suliffissaaleqisunut atugassaritaasut pitsanngorsarnissaat kiisalu utaqqiinnartunngortitsinaveersaarneq anguniarlugu.

(Inatsisartunut ilaasortaq Peter Olsen, Inuit Ataqtigiit)

Demokraatini iluarisimaarluinnarparput manna oqallinneq aallartimmat. Ukiorpassuarni illersorparput pisortat ikiorsiissutaannik pisoqartassasoq sulilernissamut piareersimangaanni.

Ilaatigut siunnersuutiginiukuurput, suliffissamut tunniunneqartumut naaggaaraanni imaluunniit suliffik tunniunneqartoq paarisinnaanngikkaanni taava pisortat pisortat ikiorsiissutaannik tunniussinngittoorsinnaatitaassasut sapaatip akunneri sisamat tikillugit sivilutigisumi, iliuutsitigut takutinneqarmat pineqartoq sulilernissaminut piareersimanngitsoq.

Tamatuma saniatigut Demokraatini arlaleriarluta oqaatigisarnikuurput innuttaasut amerlavallaat aningaasatigut kajujuummissummik amingaateqartartut sulilernissaminnut. Pisortat ikiorsiissutaatasa pisartakkat sulinermilu akissarsiat assigiinngissutaat mikivallaaqaaq, tamannalumi aamma Akileraartarnermut Tunguiinermullu Isumalioqatigiissitanit kiisalu Aningaasarsiorneq pillugu Isumalioqatigiissitanit tikkuarneqartareerpoq.

Taamaattuminguna aamma tamanna tunngavigalugu Demokraatini kissaatigigaluaripput sulinermut ilanngaatip eqqunneqarnissaa, pisortat ikiorsiissutaannik pisarnermut naleqqiullugu sulilernissamut kajujuummissut anneruleqqullugu. Tamatuma saniatigut isumaqarpugut pisortat ikiorsiissutaannut tunngasut tamarmik misissorneqassasut annertuumik iluarsartuussinissaq siunertaralugu, qularnaarumallugu, innuttaasut ikiorserneqarnissaminnut pisariaqartitsisut kisimik pisortat ikiorsiissutaannik ikiorneqartalernissaat.

Tamanna tunngavigalugu Inatsisartut oqaaseqaateqarnissaannut siunnersuut akueraarput oqallinnerullu ingerlaqqinnissaanut qilanaarluta.

Taakkuupput Demokraatini oqallinnermut ilanngukkusutagut.